



Rede ba Rai

Sekretariadu, Fundasaun Haburas, Rua Celestino da Silva, Farol, Dili- Timor-Leste

Email: redebarai@gmail.com Telemovel: +670 7922648

Rede ba Rai nudár mahon ba Organizasaun besik 20 ne'ebé kompostu husi NGO Nasionál no Internasionál sira ne'ebé servisu hamutuk ho comunidade sira iha setór oi-oin liga ho rai. Rede ba Rai nia misaun atu garante katak ema hot-hotu iha direitu hanesan atu asesu ba rai liu-liu ba ema ne'ebé mak kiak no vulneravel.

Iha Jullu Rede ba Rai Organiza Debate Públiku entre Partidu Polítiku sira ho tema “Oinsá Polítika Partidu Polítiku Atu Garante Povu Nia Direitu Asesu ba Rai”.

Debate Públiku ne'e hala'o iha Segunda, 02 Jullu 2012, iha Salaun Canossiana Haas-Laran, Manleuna. Partidu Polítiku sira la marka prezensa iha Debate Públiku ne'e hanesan: UDT; PDN; AD-Kota-Trabalhista; ASDT; PST no Undertim. Durante Debate Públiku ne'e iha perguntas 3 mak hato'o husi Rede ba Rai ba iha Partidu Polítiku sira:

- Oinsá Partidu Polítiku nia konseitu ka polítika kona ba rai wainhira iha prosesu dezvoltimentu nasional?
- Ami fiar katak ita bot sira balu sei kaer ukun iha 2012 -2017 klaru katak sei hala'o dezvoltimentu. Dezvoltimentu saida de'it sei prezisa rai, no ne'e bele hamosu eviksaun ka expropriasaun. Oinsá ita bot nia polítika atu maneja prosesu ne'e?
- Prezidente Repúblika sr. Dr. Jose Ramos Horta veto tiha ona Lei ba Rai 3 ne'e no haruka fali ba Parlamentu Nasionál iha 20 Marsu 2012. Oinsá ita boot sira nia pozisaun kona ba lei ne'ebé hetan veto husi Prezidente Repúblika sr. Dr. Jose Ramos Horta?

Iha kraik iha tabela perguntas no resposta husi kada Partidu Polítiku.

	PARTIDU POLITIKU	Sesaun Primeiru Oinsá Partidu polítiku nia konseitu ka polítika kona ba rai wainhira iha prosesu dezvoltimentu nasional?
2	PR	Partidu Republikanu rai liga ho dezvoltimentu kestaun importante tanba tuir Partidu Republikanu rai sai xave tanba ho rai mak ema halo atividade iha rai nia leten Estadu, kompañia no comunidade vulneravel sira ne'e hotu iha interese ba uza rai.
5	PUN	Polítika PUN nian kona ba rai tau rai hanesan fatór determinante desemina no promove Timor oan hotu-hotu nia moris di'ak, ema nia situasaun sósiu ekonómiku, kulturál no hametin Timor-oan hotu nia identidade tanba nia iha rai duni, PUN hakarak protégé di'ak rai ho valor kulturál no rai comunidade, atu asegura Timor-oan hotu kontinua hala'o tradisaun, agrikultura ne'ebé sira hala'o ona no mós uza rai husi aforamentu Portugés nian. PUN hakarak fó protesun tomak ba povu ne'ebé rai na'in, atu asegura katak ema ida inklui mós Estadu la bele hadau halo eviksaun forsada ne'ebé la tuir prinsipius báziku Nasoins Unidas nian ne'ebé Timor Leste hanesan membru asina ona. Ami hare direitu umanus hanesan direitus fundamentais báziku hanesan fatór importante ba Timor-oan hot-hotu. PUN sei fó direitu ema nian tuir konstituisaun ezije atu povu sai rai na'in no asegura direitu atu povu iha uma ida.
6	PD	Rai sai parte integradu ba povu nia moris, hela fatin no mós rai sei utiliza ba dezvoltimentu ba ema barak nia interese tanba ne'e PD uluk nana'in hakarak hala'o uluk administrasaun ba rai hodi identikasé mak iha rai bot no ema sé mak iha rai pedasuk ida de'it atu bele moris, tuir mai halo jestaun ba rai atu nune'e bele hare rai nia utilidade hodi fó benefsiu ba povu. Ho ida ne'e mak ita bele halo polítika ida

		hodi benefisia ba povu komún no sustentável duni iha futuru.
7	PTD	Rai hanesan asuntu importante ba povu ki'ik sira, presiza atu aseguira direitu povu ki'ik nian ne'ebé hasoru hela problema ba asesu rai. Projetu lei mak foin prodús husi Governu AMP bele fasilita ema nia direitu mak durante ne'e hasoru hanesan hakerek ona iha Artigu 15 katak sei fó kompensasaun ne'ebé justu no Konstituisaun RDTL artigu 54 mós garante ema ida-idak nia direitu asesu ba rai.
8	PSD	Presiza identifika ba uzu rai, hafoin halo ordenamentu territóriu nasionál atu identifika rai ne'ebé mak di'ak ba kuda ai han sira tuir mai halo levantamentu kadestral hodi identifika rai vadios atu nune'e bele halo distribuisaun rai ne'e ba ema sira mak la-iha rai ka presiza rai no sira presiza hetan sertifikadu atu sira bele utiliza rai ne'e hodi sustenta sira nia moris no hadi'a sira nia ekonomia, bele halo reforma agraria iha ultimo rekursu maibé ba rai ne'ebé mak mamuk la'ós rai mak ema utiliza tiha ona hodi halo atividades sosiál.
9	FRENTI MUDANCA	Asuntu pobreza tanba impaktu husi istória akontese iha nasaun hot-hotu inklui Japaun, Frenti nia prinsipiu luta ba reforma agraria tanba povu barak mak preokupa kona ba lei ba rai. Frenti Mudansa ho esforsu tomak atu define polítika rai tuir konseitu báziku, prinsipiu justisa social no deklarasaun direitus umanus kona ba originilidade sai na'in ba rai.
10	KHUNTO	Konseitu Khunto kona ba rai, dezentvolvimentu hala'o iha rai nia leten, situasaun jurídiku iha Timor Leste iha ona Lei 3 de'it, Lei no1/2003 Regime Jurídiku dos Beins Imoveis, Dekretu Lei 19/2004 Rejime Jurídiku ba soi-metin iha fatin afetasaun ofisiál no arrendamentu iha soin metin domínio privadu estadu nian no Lei no12/2005 ba soin metin liu-liu arrendamentu entre sidadaun ho sidadaun seluk maibé lei sira ne'e fraku tebes.
11	CNRT	Konseitu polítika rai sei bazeia ba realidade no konsidera ba konseitu rua iha Timor Leste, hare ba faktu istóriu TL durante tempu Portugés no Indonesia Timor-oan barak mak la iha direitu asesu ba rai segundu hafoin Independénsia 2002 tuir Konstituisaun RDTL ne'ebé simu mós normas Internasionáis. Partidu CNRT respeita no aseguira hodi salva direitu ema hot-hotu nian ba rai tuir Konstituisaun haruka. CNRT iha devér atu aseguira Timor-oan hotu nia direitu ba rai, CNRT konsiente katak Timor-oan hot-hotu iha direitu atu hetan nia rai tanba rai mak direitu fundamental tenke aseguira iha lei oan sira. Wainhira Estadu presiza rai ruma Partidu CNRT sei garante katak eviksaun ka foti rai husi povu sei halo ho justa indenminizasaun no hetan akordu husi parte hot-hotu. Eviksaun ne'ebé sei kontinua hala'o la'ós tanba situasaun ne'ebé mak Partidu CNRT hakarak maibé tanba realidade kontinuidade utiliza lei anterior no1/2003.
12	FRETILIN	Fretilin nia luta atu liberta rai no povu. Iha prosesu dezentvolvimentu ba sector hotu inklui uzu kostumeiru presiza iha ninia fatin no povu tenke iha direitu hanesan atu asesu ba rai, dezentvolvimentu tenke iha konsesu ba rai. Rai mak sai factor determinante no dezentvolvimentu tenke valoriza tenke hadi'ak povu nia moris. Libertasaun povu tenke liberta mós rai, kompromisu ida katak Partidu Fretilin ukun labele halo povu sai vítima tan iha prosesu dezentvolvimentu.
13	PDP	Se rai uza hodi halo dezentvolvimentu ba nasaun nian interese se ita ko'alia rai iha ligasaun mós ho lei sivíl Timor-Leste nian la dun fó vantage di'ak atu protégé no aseguira povu ki'ik no mukit sira nia direitu, tanba ne'e antes atu halo desizaun ba hala'o dezentvolvimentu presiza halo konsulta atu nune'e dezentvolvimentu ne'ebé forte no di'ak hodi valorize povu nia direitu.
14	BLOKU PROKLAMADOR	Bloku Proklamador ko'alia kona ba asuntu rai ne'e prioridade katak sei tama iha lista wainhira hetan konfiansa hosi povu ne'e atu iha Parlamentu Nasionál. Wainhira iha dezentvolvimentu tenke halo ema nia moris di'ak liu tan no presiza mós fó protesasaun ba ema sira ne'ebé mak hetan impaktu husi dezentvolvimentu ne'e.
17	PDC	Dezentvolvimentu bazeia ba Konstituisaun RDTL katak atu protégé ema hotu nia direitu ne'ebé mak hanesan. Wainhira nasaun no povu nia moris atu la'o di'ak wainhira ida-idak hatene nia direitu, devér no responsabilidade do Estadu, katak Estadu no povu iha direitu. Wainhira Estadu atu harii dezentvolvimentu PDC sei halo Lei tuir ema ida-idak nia direitu. Dezentvolvimentu povu sei halo transmigrasaun no kria

		kondisaun hodi hetan no labele halo kompensasaun ba osan de'it.
18	PDL	Prezidente Mario Araújo mai tarde hafoin sesaun ne'e remata.
19	AMPT	Ema hot-hotu iha direitu hanesan atu asesu tantu ba rai, edukasaun, saúde nsst. Dezenvolvimentu presiza hare uluk kondisoos moris povu nian liga ho rai mak nia hela no horik ba. APMT se wainhira kaer ukun sei garante atu povu ne'e bele iha direitu ba rai.
21	PLPA PDRT	Tinan 10 ona rai sai preokupasaun no polemika iha sosiedade nia leet. Planu Estratéjiku polítika PLPA no PDRT ba rai fahe ba pontus 4: <ul style="list-style-type: none"> • Kria lei ida atu respeita no valoriza sidadaun ne'ebé mak iha rai rasik dezde bei-ala sira tantu bot ka ki'ik. • Kria lei atu entrega fali rai povu nian rai ne'ebé okupa husi kolónia portugés. • Kria lei ida atu entrega fali rai ne'ebé mak uluk estadu no povu Indonesia okupa. • Kria lei ida atu valorize no respeita povu ne'ebé mak iha rai maski lai iha sertifikadu. Tuir Koligasaun katak saida mak povu nian tenke entrega ba povu no saida mak estadu nian entrega ba estadu atu nune'e minimiza situasaun ne'ebé mak atu hamosu konflitu iha futuro.

N O	PARTIDU POLITIKU	SESAUN SEGUNDU Ami fiar katak ita bot sira balun sei kaer ukun iha 2012 -2017 klaru katak sei hala'o dezenvolvimentu. Dezenvolvimentu saida de'it sei presiza rai, no ne'e bele hamosu eviksaun ka expropriasaun. Oinsá ita bot nia polítika atu maneja prosesu ne'e?
2	PR	PR nia polítika presiza iha uma ida no rai pedasuk ida ba familia ida, maibé uluk nana'in presiza halo revizaun ba lei ne'ebé mak veto husi Prezidente Repúblika, presiza halo identifikasaun rai ne'ebé mak husik hela iha tempu Portugés no Indonesia katak rai adat, rai privadu no rai estadu. Wainhira atu halo dezenvolvimentu presiza halo preparasaun em kondisaun no kompensasaun justu dunik. Populasaun tinan ba tinan aumentu atu uza loloos rai ita presiza halo planu one stop service Ministériu hot-hotu tenke koloka iha fatin ida atu miniza ema nia uza ba rai. Lei ne'ebé mak Governu prodús maibé la hetan promulga husi Prezidente Repúblika.
5	PUN	Wainhira halo dezenvolvimentu ba interese nasional PUN sei define didi'ak interese nasional, halo audiénsia publika, konsulta ho comunidade, hato'o planu ba ema sira ne'ebé mak atu afeta, desimina informasaun avansadu, fó tempu ba publisidade atu ema hotu bele hatene planu governu nian, fó oportunidade atu asesu legal no tékniku hodi asegura ema hotu nia direitu, halo audiénsia públiku ho grupu afetadu no NGO atu bele dezafia no artikula prioridade dezenvolvimentu ne'e prioridade ka lae. Ko'alia kona ba eviksaun sei halo buat hotu hodi tuir padraun direitus umanus, inklui ema sosiais, la bele viola ema nia direitu, la bele uza violénsia jéneru husi PNTL, presiza iha kompensasaun justa. PUN sei uza prinsípios báziku no lei internasionál atu asegura ema nia direitu no ema nia direitu tenke hanesan ho Estadu. Tenke hadi'a sistema justisa no Parlamentu atu asegura no promove ema nia direitu.
6	PD	Partidu Demokrátiku nia polítika halo desentralizasaun ba distritu sira, no mós halo ekilíbriu dezenvolvimentu iha area urbanu no rural atu la bele hadau malu rai entre povu no estadu iha Dili laran, se atu garante ba povu nia direitu iha Dili laran Governu bele fahe rai parcela balun ba sira ne'ebé presiza rai maibé presiza halo planu urbanizasaun di'ak atu hodi maneja no mós halo administrasaun di'ak atu bele garante povu nia direitu asesu ba rai.
7	PTD	Prosesu dezenvolvimentu ne'ebé atu hala'o iha futuro presiza hala'o kooperasaun entre povu no governu iha akordu amigavel. Tuir peskiza PTD halo no hare mós Anteprojetu mak Ministériu Justisa halo ne'e iha Artigu 15 no Konstituisaun 54 número 3 tenke iha indenizasaun ne'ebé justu. Hare mós ba kódigu atu responde ba prosesu ne'e.
8	PSD	Rai liga ho kestaun dezenvolvimentu, estadu atu uza ba interese ema hotu nian ita presiza buka dalan ida di'ak buka solusaun amigavel atu

		halo ba desizaun ne'e, expropriasaun atu halo wainhira la-ihá tan ona alternativa no indenizasaun justu no mós bazeia ba valor sentimental tanba povu iha area rural hare rai ne'e valor bot. Wainhira atu hasai ema ida tenke iha garantia ba fatin alternativa tanba Timor Leste nudár Estadu de direitu.
9	FRENTI MUDANCA	Iha dezvoltimentu presiza identifika rai lisan, estadu no privadu no tenke garantia sidadaun nia direitu uza rai iha future no rai uza ba interese kolektivu la'ós ba kompañia boboot sira nia interese. Tanba ne'e reforma agraria sai hanesan programa importante iha Partidu Mudansa nian. Ko'alia kona ba Eviksaun ita iha baze legal balun no mós ko'alia kona ba ema ne'ebé mak luta ba sira nia rai ne'e ema sira ne'ebé uluk moris iha nia area orginal no iha Deklarasaun Nasoins Unidas nian artigu 10 katak ema original sei la bele hetan eviksaun forsada husi sira nia rai ka territóriu, sei la akontese re-alokasaun wainhira sein iha informasaun preliminaría mak adekuadu. Iha artigu Komisaun ONU nian ba asuntu social, ekonomia no kultura iha ne'ebá mós ko'alia kona ba eviksaun no komisaun ne'e rasik halo ona definisaun no prosedimentu ba eviksaun, antes halo eviksaun.
10	KHUNTO	Ko'alia kona ba eviksaun ita ko'alia kona ba konviksaun. Lei ba rai la aprova, rai kompleksu tebes tenke trata rai ho responsabilidade dimensional iha ekonomia, social, polítika kulturál defeza no seguransa. Khunto hetan lejitimidade Parlamentár sei defende resolve rai no propriedade hodi hatán ba situaun real ne'ebé Estadu no povu TL hasoru, dezvoltolve enkuadramentu jurídiku ida atu dignifika povu TL nia direitu, tanba úniku riku soin ne'ebé nia iha mak rai ketan ida ne'ebé nia hela ba. Khunto nia kompromisu polítiku asuntu rai no propriedade sai proposta úniku ne'ebé sei defende. Iha V Governu Konstitusionál sei harii Instituisaun ida mak independente no autónoma atu trata asuntu rai no propriedade.
11	CNRT	Partidu CNRT wainhira atu halo dezvoltimentu hodi implementa Planu Estratéjiku Dezvoltimentu (PED) primeiru tenke iha Lei ba Rai atu rekoñese ema nia direitu. CNRT kaer ukun nia konseitu implementasaun PED, atu halo eviksaun sei halo iha ultimo rekursu katak se meius hotu-hotu la iha ona mak bele halo eviksaun maibé ho kompensasaun ne'ebé mak justu ne'ebé hakerek iha lei expropriasaun. Oinsá atu fó kompensasaun sei bazeia ba dekretu lei ida atu define rai sira ne'ebé mak hanesan Timor-oan nian no presu kompensasaun sei la hanesan iha area rural no urbanu.
12	FRETILIN	Dezvoltimentu tenke halo povu atu moris di'ak la'ós atu sai vítima, polítika partidu Fretilin mak ukun tenke iha konsensu dezvoltimentu no tenke iha konsulta. Dezvoltimentu tenke hetan espasu ba povu hodi garante ba moris di'ak. No tenke iha kooperasaun entre Instituisaun tenke metin wainhira Tribunal halo desizaun ruma Governu tenke rona no oinsá atua no resolve difikuldade povu nian. Governu atu halo dezvoltimentu tenke halo konsultasaun ba planu dezvoltimentu ne'e ho entidade hotu inklui partidu polítiku no povu. Povu la bele sai vítima iha dezvoltimentu, tenke hametin dezvoltimentu iha area rurais no urbanu.
13	PDP	Kria mekanizmu di'ak wainhira atu halo eviksaun, halo komunikasaun rasik ho ita nia povu ne'ebé mak atu hetan eviksaun, tanba wainhira comunidade la-ihá uma no rai mak bele kria instabilidade, povu presiza asesu ba rai ho di'ak, halo komunikasaun entre Estadu no povu kona ba objetivu dezvoltimentu.
14	BLOKU PROKLAM ADOR	Dezvoltimentu ne'e iha mós nia impaktu negativu, wainhira hakarak hala'o dezvoltimentu klaru iha ninia impaktu dunik. Importante mak protégé ema sira nia direitu mak sai vítima iha dezvoltimentu ne'e. Ita Tenke ko'alia ba prosesu tenke iha transparénsia, esplika ba ema ne'e objetivu eviksaun. Ema ne'ebé mak hetan eviksaun tenke hetan kompensasaun justu, iha apoiu legal no iha fatin alternativu hodi moris dignu. Presiza iha lei ida no halo mós treinamentu ba instituisaun governu nian hanesan staff relevante no polísia atu trata ema hanesan umanu.
17	PDC	Wainhira atu halo dezvoltimentu PDC sei iha mekanizmu planeadu wainhira atu halo eviksaun ba rai no uma estadu nian ne'ebé mak povu hela ona, tanba polítika mak povu sai vítima hodi hela iha fatin ne'e. Wainhira PDC kaer ukun sei kria mekanizmu no diálogu ho populasaun hodi halo transmigrasaun tuir planu governu nian, se wainhira atu muda povu presiza kria mós kondisoos halo transmigrasaun

		tuir planu governu nian, wainhira muda povu husi Dili presiza kria fatin alternativa ho asesu ne'ebé hanesan. Wainhira hala'o dezvoltimentu mak la hetan konkordánsia ba negosiasaun entre povu no governu, PDC sei foti rai alternativa katak rai ne'ebé mak mamuk ka ema la hela hodi halo dezvoltimentu, presiza hetan kompromisu polítiku entre parte 2 hotu, tenke trata povu hanesan umanu no Governu la bele sai hun ba problema.
18	PDL	Konseitu rai, Estadu iha atu defende direitu indivídu nian, ema mak rai no rai mak ema no rai la bele haketak. Bazeia ba istória katak ema tomak iha Timor-Leste iha rai. Ko'alia kona ba estadu abstratu se wainhira Estadu atu foti rai uza ba dezvoltimentu hodi presiza aluga ho presu mínimu. Nesidades individual tenke bot liu duke nesedidades seluk.
19	AMPT	Dezenvolvimentu atu uza ba povu nia di'ak, estratéjia polítika APMT nian dezvoltimentu sei halo iha rai. Primeiru tenke iha kooperasaun entre Governu ho povu, kria kondisoos ba povu antes atu muda sira, no dezvoltimentu atu hakmaan no halakon povu nia sofrimentu atu trata ema nia direitu hanesan ho estadu no povu tenke sai beneficiariu ba dezvoltimentu ne'e.
21	PLPA PDRT	Direitu hanesan ba ema hotu bele asesu ba rai, infraestrutura mak fraku, atu halo urbanizasaun sidade tenke sosializa lei ne'e, hodi bele hatene povu nia direitu.

NO	PARTIDU POLITIKU	SESAUN TERSEIRU Prezidente Repúblika Dr. Jose Ramos Horta veto tiha ona Lei ba Rai 3 ne'e no haruka fali ba Parlamentu Nasionál iha 20 Marsu 2012. Oinsá ita boot sira nia pozisaun kona ba lei ne'ebé hetan veto husi Prezidente Repúblika sr. Dr. Jose Ramos Horta?
2	PR	Partidu Republikanu hamriik atu hadi'a nasaun ida ne'e, deputadu balun ladún iha interese. Prezidente Repúblika veto ba Lei ba Rai 3 ne'e tanba konsultasaun la-kle'an la involve entidade hot-hotu ne'e razaun fundamental. Problema rai agora, presente no mós iha futuro. Rai Timor ne'e rai parental katak mai husi uma kain ida no uma lisan ne'e reforma tiha ona. Atu hatene kle'an presiza halo peskiza kle'an. PR hakarak hadi'ak lei ne'e wainhira iha Parlamentu Nasionál. Lei ba Rai ne'ebé halo husi Governu AMP maski la hetan promulgasaun husi Prezidente Repúblika maibé CNRT implementa ona hanesan eviksaun mak akontese iha tinan 2 hirak ne'e satan hetan promulgasaun.
5	PUN	PUN sei muda Lei 3 ne'ebé Governu AMP halo. Regime Espesiál Definisau Beins Imoveis sei hadi'a hodi garante povu nia direitu tomak ba rai. Lei Expropriasaun PUN sei kansela tanba la'ós atu halo lei hodi expropria ka hasai rai presiza halo estudus atu koñese kontextu povu Timor Leste nian no nesidade estadu Timor-Leste nian tomak. Lei Fundu imobiliariu sei kansela tanba sei presiza atu halo uluk hodi kompleta rejistu no identifika sé mak rai na'in asuntu saida mak mosu hodi kalkula kustu estadu nian. Presiza muda fundu nia estrutura tanba bele hamosu korrupsaun bot. Sei haree fundu ida atu transparénsia no akuntabilidade atu fó asesu ba ema hotu. Wainhira iha PN ami sei muda Lei ba Rai sira ne'e iha ninia ki'ik no bot.
6	PD	PD hanesan parte iha governasaun AMP lamenta duni tanba tinan 10 ona ita tenta atu hahú maibé la konsege aprova lei ida atu hahú estatutu ida ba rai iha Timor-Leste nian. Ita presiza hahú lei ida la signifika kompletamente perfeitu ita bele hadi'a lei ida ne'e. PD sei kometimentu kontribui hodi nafatin lori lei ne'e aprovasaun final iha Parlamentu Nasionál maibé sei halo debate detallu no extende konsulta atu hare kestoes ne'ebé mak sei sai ema hotu nia preokupasaun hodi identifika problemas ne'e loloos, atu nune'e bele resolve duni problema rai se wainhira PD kaer ukun ka sei sósiu ho partidu seluk.
7	PTD	Prezidente Repúblika nia bele veta Lei ba Rai 3 ne'e nia knar. Bazeia ba peskiza PTD se ema barak hakarak atu muda ka altera, ami sei koopera atu halo alterasaun. Tuir interpretasaun PTD katak lei ne'e di'ak liu duke lei actual mak vigora.

8	PSD	Lei ne'e regime ida atu resolve problema iha rai mak agora akontese daudauk ne'e. Lei ba Rai nian sei dezenvolve tuir mai iha loron ruma. Lei ne'e liu husi prosesu ida ne'ebé naruk, halo husi Ministra Justisa, Konsulta ho NGO, Komisaun A halo audiénsia ho NGO's, ikus mai la hetan konsesu iha Parlamentu Nasionál tanba povu rasik mós la iha konsesu ba Lei ba Rai 3 ne'e tanba Parlamentu nudár representante povu, entre povu sira mós la konkorda lei ne'e, se wainhira la iha konsensu ba lei rai nian problema rai sei la resolve. Too agora seidauk hatene razaun PR veto ba Lei ba Rai ne'e.
9	FRENTI MUDANCA	Prezidente la promulga tanba povu barak, PST no agrikultór sira halo reasaun no protesta. Lei ne'e rasik iha frakeza iha artigu balun. Frenti Mudansa ho hanoin ida katak lei ne'e wainhira la benefisia ba povu presiza halo revizaun. Lei halo la liu husi prosesu analiza kle'an social no kulturál. Presiza iha konsesu nasionál atu hanoin ba povu kiak iha rai ida ne'e sira nia moris liga ho social-kulturál no ekonómiku. Iha ka lae vontade iha Parlamentu Nasionál foun atu hadi'a lei ne'e. Prezidente Repúblika TMR mós halo nia kampaña ba hare liu ba ema kiak no mós asuntu rai.
10	KHUNTO	Se wainhira iha Parlamentu Nasionál Khunto sei defende lei rai ne'e hamutuk ho PN tomak. Iha 2009-2010 Ministériu Justisa hamutuk ho PINR servisu hamutuk atu halo deklarasaun rai no presiza fó oportunidade ema hotu atu halo deklarasaun. Lei ba Rai lori prosesu naruk hodi hakerek ne'ebé hetan suporta husi povu Amerikanu. Wainhira PR veto mak ita presiza hadi'ak. Lei ba Rai presiza fó direitu atu ema hotu atu halo deklarasaun tantu ema Timor-oan mak hela iha rai-laran ka iha rai-li'ur. Pozisaun Khunto presiza hadi'a lei ba rai 3 ne'e, wainhira Khunto hakerek lei sei uza asesor nasionál hodi iha kolaborasaun, koordinasaun mutual atu lei ne'e hetan promulgasaun iha tempu badak.
11	CNRT	CNRT halo parte husi Governasaun AMP ne'ebé Ministériu Justisa halo konsultasoes públikas iha distritu no rekolla informasoes factual no actual povu no maioria tenke responde ho lei ida ne'ebé adekuaudu ba sira nia situasaun. Elabora tiha ona Lei Regime Espesiál ba Definisaun Beins Imoveis hodi halo balansu be ema hotu nia direitu ba rai, Lei ne'e rekoñese ema nia direitu tantu ema Timor-oan mak hela iha rai laran ka li'ur, ema ne'ebé hela iha rai maibé la-ihá sertifikadu, ema ne'ebé mak iha sertifikadu tempu Portugés no Indonesia, no mós rekoñese direitu informal ne'ebé sira la bele hetan sira nia direitu ba rai iha tempu kolonializmu Portugés no okupasaun Indonesia nian.
12	FRETILIN	Ko'alia kona ba rai, ita presiza iha baze legal maibé lei ne'e halo diskriminasaun iha desigualdade tratamentu ba sidadaun, filozofia ladún tuir maubere nian ema ne'ebé mak okupa rai boboot ho sertifikadu aforamentu iha momentu ne'ebá automatikamente transforma ba na'in ne'ebé aktualmente ativu. Lei ne'e atu legaliza ema ne'ebé mak iha sertifikadu Portugés no Indonesia. Konstituisaun RDTL hateten katak ema ida presiza iha rai maibé la'ós ema ida atu okupa rai hectares atus ba atus. Lei Regime Espesiál ne'e tenke benefisia ba povu ki'ik, entaun presiza hare artigu ba artigu hodi bazeia ba prinsipiu Konstituisaun RDTL Artigu 54.
13	PDP	PDP sei hare razaun Prezidente Repúblika veto ba Lei ba Rai 3 ne'e tanba ladún protégé povu ki'ik nudár sidadaun, PR ne'ebé hakarak representa ba povu ki'ik mak agora daudauk hakilar ba asesu rai, ita tenke hare ba sira nia nesidade hotu. Prezidente Repúblika veto ba Lei ne'e ami mós konkorda tanba lei ne'e la protégé no la valoriza povu ki'ik sira nia direitu.
14	BLOKU PROKLAM ADOR	La hatene razaun fundamentál tanba saida mak Prezidente Repúblika veto lei 3 ne'e, vale apena hetan veto husi Prezidente da Repúblika. Realidade iha Parlamentu iha grupu bot 2 mak polarizadu hodi difikulta atu hetan ema hotu nian hanoin tanba iha opozisaun no governu no lei ne'e mai de'it husi grupu AMP. Presiza iha duni lei ida no produktu ne'e tenke mai husi Parlamentu Nasionál tomak tanba sira mak representa povu. Iha futuru PN presiza halo konsultasaun kle'an, abragente ho ema tomak atu lei ne'e representa ema povu Timor nia interesse.
17	PDC	Prinsipiu fundamental mak harii nasaun husi família. Prezidente veto nia halo duni nia servisu ne'ebé mak di'ak. Iha lei ne'e la protégé ema ki'ik sira nia direitu maibé fó forsa bot ba Governu, kompañia no mós ema estranjeiru no ema mak iha kapitál ka iha osan. PDC halo

		ona estudu própriu ho referénsia husi nasaun ki'ik ka bot, se povu fó fiar ba PDC kaer ukun mak ami sei hadi'ak lei ne'e no tenke garante ema hotu nia direitu tuir Konstituisaun nian.
18	PDL	Se mak uza rai povu nia tenke aluga la bele uza gratuita selae ita lori interese privadu hodi hetan benefísiu. Lei ne'e tenke serbí povu, povu Timor la bele sai atan ba lei, kontektu rai iha Timor Leste Liberal hare katak presiza uza aprosimasaun diskriminasaun positive katak se-mak iha rai hektares bot liu tenke hamenus no fahe fali ba se-mak la iha no presiza rai. Importante tebes atu uza diskriminasaun pozitivu iha asuntu rai ne'ebé mak hakerek ona iha Cedaw hodi fahe rai. Sertifikadu tempu Portugés no Indonesia nian sei sai de'it hanesan administrasaun atu identifika nia los ka lae na'in ba propriedade ne'e. Atu identifika katak sertifikadu ne'e los dunik presiza husu lia na'in, comunidade no viziñu sira mak hela iha area ne'ebá. Halo lei tenke iha halo konsultasaun hodi hetan partisipasaun husi ema hotu nian liu-liu ema ne'ebé mak iha koñesimentu ba lei iha parte kulturál, social, ekonomia nsst. PR veto ba Lei ne'e, tanba ema ne'ebé halo lei sempre hatama ema 1-2 ka grupu balun sira nia interese hodi hetan benefísiu. Presiza halo peskiza husi parte hot-hotu atu identifika uzu rai iha Timor-Leste antes atu hakerek Lei ba Rai.
19	AMPT	Hamosu Lei atu fó benefísiu ba ema. No tanba sá presidente la promulga hamosu duvidas ruma ka hamosu erru ruma iha lei ne'e karik. Entre partidu tenke konsulta malu, hodi hadi'a no hetan fó benefisia ba ema hotu no hodi hetan promulga husi president repúblika. Lei tenke fó dunik benefísiu ba ema hotu la'ós ema id aka rua.